

Bloque

A Laracha

Número 5. Epoca 2ª / 1º trimestre 2009

Impreso postal sen enderezo

Entrevista con Anxo Quintana, candidato á presidencia da Xunta

“O BNG quere facer política para a xente cun proxecto transformador”



Anxo Quintana co Grupo Municipal do BNG da Laracha

As enquisas falan dunha reedición do bipartito despois do 1-M. Que papel xogaríaa o BNG nese escenario?

O que constatan todas as enquisas e, sobre todo, o sentir na rúa é que o BNG vai ascender nestas eleccións. O que queda por ver é canto e agora fica o traballo para que esta ascensión sexa o meirande posíbel. Ésta é a única incógnita que hai que despxear nestas eleccións porque é evidente que o PP non vai gobernar e todos lle outorgan ao PSOE unha representación parecida á que xa ten. A novidade nestas eleccións é o BNG e iso é produto dun traballo moi intenso no goberno e de toda a militancia durante estes anos, que colocou o nacionalismo no mellor momento político da súa historia. Agora o que convén é mobilizar todos os esforzos para aproveitar esta grandísima oportunidade histórica. Ante unhas expectativas así non nos poñemos límites no noso ascenso nin nas nosas pretensións.

Que propostas do programa do BNG serán determinantes na transformación e o avance do país?

Hai tres ámbitos nos que se desenvolve o noso proxecto para a próxima lexislatura. O primeiro é facer política

para a xente. Nesta crise económica fálase demasiado dos bancos, da bolsa e das grandes operacións financeiras, e pouco da xente que está no paro, que ten medo a perder o seu posto de traballo, que non durme pensando en como pagar a súa hipoteca. Ésa é a xente que ao BNG lle interesa, para a que queremos facer política e por iso temos que consolidar o Sistema Galego de Benestar e o Plan Sectorial de Vivenda protexida; por iso é tan importante seguir xerando emprego e fortalecer os nosos sectores estratéxicos como o naval, pondo en marcha o estaleiro de Astano en Fene; por iso é tan importante conseguirmos na próxima lexislatura ter un grupo lácteo que estructure o mundo rural.

O BNG é un proxecto transformador. Non nos conformamos con xestionar o presente, queremos transformar a realidade a favor das maiorías sociais. Queremos pór en marcha un modelo económico diferente ao que sempre defendeu o PP. Hoxe moitas empresas e familias atópanse con problemas para conseguir crédito e por iso é tan importante pór en marcha un Instituto de Crédito Oficial de Galiza, porque é necesario que a Administración Pública cubra ese terreo.

“Temos que conseguir nos vindeiros catro anos que Galiza ocupe o lugar institucional que lle corresponde”

En terceiro lugar, todo o mundo sabe que a presenza do BNG no goberno e a nosa representación en Madrid servíu para que Galiza teña outro papel dentro da política de Estado e temos que conseguir nos vindeiros catro anos que Galiza ocupe o lugar institucional que lle corresponde. Para iso é necesario un Novo Estatuto que recoñeza o noso carácter nacional, dun ámbito competencial ambicioso, con un modelo de financiamento que permita executalo con garantías e que lle dea ao galego o mesmo estatus xurídico-político que o castelán.

Pensa que a coincidencia das eleccións galegas coas vascas pode restar protagonismo a Galiza?

Hai algunhas forzas políticas preocupadas porque, ao coincidir coas eleccións vascas, Madrid vaille prestar menos atención a Galiza. Nós temos que estar encantados por iso. Canta menos atención nos presten desde Madrid, menos barbaridades imos escoitar. A xente sabe que o 1-M o que toca é Galiza, que imos votar para acadar as mellores solucións aos problemas dos galegos e galegas, e esas son as solucións que ten o BNG.



www.bng-galiza.org
Edita: BNG A Laracha

Un programa para ter máis avances e máis futuro

Autogoberno

O BNG impulsará un novo Estatuto de Nación que protexa os nosos sinais de identidade, garanta a igualdade de estatus xurídico entre o galego e o castelán e asegure as competencias e os recursos financeiros que Galiza precisa. Mentres non se aprobe, continuará o traballo para establecer un marco de relacións bilaterais co Estado e para a transferencia de novas competencias, en especial, as de inspección e seguranza marítima, e as de tráfico e seguranza viaria. Ademais, darase un impulso ás relacións exteriores, promovendo a participación directa ante a UE e dedicando especial atención ás relacións con Portugal.

Medidas económicas

Apostamos pola reforma da Lei reguladora das Caixas de Aforro de Galiza co fin de democratizar a súa estrutura e estreitar o seu compromiso coa economía produtiva e a creación de emprego no país. Creación do Instituto Galego de Crédito. Impulsaremos o sector da construción naval galega, recuperando o estaleiro de Fene para a construción naval civil. Seguirase a impulsar o I+D+i co obxectivo de acadar un investimento do 2% sobre PIB no 2013. No tocante ás TIC, o BNG seguirá promovendo o software libre e estenderá ao 100% do país a cobertura de banda larga e TDT. Esta lexislatura será a da creación do Grupo Lácteo Galego e dunha nova Lei de Montes. O BNG tamén promoverá dun Plano Galego de Pesca de Baixura e Litoral que atenda á recuperación dos caladoiros, á súa explotación sustentábel e a comercialización a prezos rendíbeis.

Benestar e Igualdade

Apostamos por incrementar o complemento das pensións non contributivas. Impulsaranse dos programas de mantemento das persoas maiores no seu contorno, ampliando a cobertura dos servizos de proximidade. Por outra parte, apóstase por alcanzar a ratio de 5 prazas en residencias públicas por cada 100 maiores. O BNG aumentará a rede de Galescolas con 10.000 novas prazas



O BNG aposta por crear servizos de cercanías e xestionalos desde Galiza

e apostará polas medidas efectivas para rematar coa discriminación da muller no mundo do traballo.

Sanidade

Destaca a potenciación dun servizo sanitario público máis eficaz a través da integración do SERGAS das entidades subsistentes (O61, Galaria, Centro de Transfusións de Galiza, etc.) e da promoción da dedicación exclusiva dos profesionais. Alargarse até os 18 anos a atención bucodental básica e gratuíta.

Ensino

Apostaremos por un ensino público e galego. Así, o 6% do orzamento galego debe destinarse a esta área, coa finalidade de incrementar o profesorado e o persoal de apoio no ensino obrigatorio, para reducir o número de alumnos por aula. No referente á Universidade, apóstase pola converxencia coa porcentaxe estatal de gasto por alumno. Dentro do impulso á investigación universitaria, aprobaremos o Estatuto e a Carreira Profesional para o Persoal Investigador.

Infraestruturas e Vivenda

O BNG apostará pola transferencia a Galiza da xestión da AP-9 e das autovías coa meseta. Así mesmo, crearase un Ente Ferroviario Galego para a prestación dos servizos de cercanías nas áreas metropolitanas e urbanas de Galiza. En Vivenda, construiremos 45.000 vivendas protexidas nos próximos oito anos. Así mesmo, promoveremos a dotación de 20 millóns de m² de solo produtivo na vindeira lexislatura.

Cultura, deporte e lingua

Posta en marcha da Cidade da Cultura como axente promotor da produción e innovación culturais, impulsor da presenza internacional da nosa cultura e da protección do patrimonio e mais tamén como activo para o desenvolvemento económico de Galiza. Promoverase a práctica deportiva entre todos os galegos e galegas e impulsarse a presenza internacional das nosas seleccións. Daremos un novo impulso aos procesos de normalización do noso idioma: financiamento e cumprimento efectivo tanto do Plano Xeral de Normalización da Lingua Galega como do Decreto de uso do Galego no Ensino.

Ambiente

Impulso dunha nova política de xestión de residuos a través da reformulación de SOGAMA cara a reciclaxe e a reutilización, combinada coa implantación de complexos de compostaxe de ámbito comarcal. Prohibiranse novos aproveitamentos hidroeléctricos nos xa saturados ríos galegos.

Administración, seguranza e Xustiza

Esta lexislatura será a do despregamento da Policía Galega, coas máximas competencias posíbeis. O BNG promoverá a desburocratización da administración pública e un Pacto Galego pola Xustiza. Así mesmo, aprobarase nos seis primeiros meses da lexislatura a reforma da CRTVG.

Ana Pontón, candidata número 2 pola Coruña

“O nacionalismo debe ter máis peso para que as políticas de cambio transformador se leven adiante en plenitude”



Coa tranquilidade que dá o traballo ben feito e con moita ilusión. Así é como afronta Ana Pontón esta campaña electoral. A número dous pola Coruña opina que a sociedade galega valora o labor do BNG nestes catro anos e aposta pola necesidade de que o nacionalismo continúe despois do 1-M co seu labor transformador desde o goberno.

Todo apunta a unha reedición do bipartito. Cal cre que será o papel do BNG neste escenario?

Un dos obxectivos fundamentais é que o BNG teña máis representación, máis peso no goberno e, polo tanto, aspiramos a que o vindeiro presidente da Xunta sexa nacionalista. Estes anos demostran que políticas pensadas desde Galiza, sen condicionantes, teñen resultados positivos e así se pode comprobar nas diferentes áreas en que o BNG tivo responsabilidades.

É importante para o futuro do país que o nacionalismo teña máis peso e, polo tanto, que as políticas de cambio transformador que levamos no programa se poidan levar adiante na súa plenitude.

Nestes anos exerceu a portavocía no Parlamento en Igualdade. Que propostas aportará o BNG para a vindeira lexislatura?

Déronse pasos moi importantes na pasada lexislatura. Superouse o enfoque do PP de considerar as políticas de igualdade como algo meramente decorativo.

Destacaría propostas como a creación dunha Defensoría da Igualdade. Será importante á hora de crear ámbitos especializados e independentes na Administración Pública que nos permitan ir atacando as desigualdades. Será un organismo que denuncie as discriminacións e no que as mulleres van ter unha aliada.

Tamén exerceu a portavocía no ámbito de Xuventude

Se algo demostra esta lexislatura é que as políticas de xuventude son algo máis que ideas para o ocio e o tempo libre, que se pode aplicar un enfoque transversal. Hai que consolidar proxectos postos en marcha como a rede de centros Quérote, ou a de locais de Ensaio, pioneiros na UE.

Queremos unha Lei de Mocidade na vindeira lexislatura para que, por vez primeira, estas políticas se establezan con rango de norma. Esta lei pechará moitos dos ámbitos xa iniciados en política xuvenil.

Finalmente, tamén foi portavoz en Medio Ambiente...

Lamentábelmente, moitas das situacións que herdamos do PP non están solucionadas ou ben encarriladas.

Nomeadamente, dúas cuestións. En primeiro lugar, a próxima ten que ser a lexislatura na que o saneamento integral das nosas rías sexa unha realidade.

Cómpre desenvolver un novo modelo de xestión dos nosos residuos. Nesta lexislatura o PSOE optou por dar continuidade ao modelo anterior. Sogama é un edificio no que se intentou facer unha reforma parcial pero está claro que, se o que fallaba era a estrutura, era necesario derrubar o edificio e construír un novo.

Cales son as asignaturas pendentes da provincia da Coruña?

Apostamos pola creación de dúas áreas metropolitanas no actual ámbito provincial. Unha debería ser A Coruña-Ferrol e outra na capital galega.

Na Coruña están algunhas das zonas con máis importancia leiteira do país. Hai un sector lácteo moi relevante que a UE sitúa entre as áreas de maior futuro. É importante o desenvolvemento de iniciativas e o mantemento do contrato de

explotación sustentábel, a orientación de que os fondos deben ir para quen quer producir. Por isto apostamos por un grupo lácteo galego que permita dimensionar o sector.

Astano debe volver á construción naval-civil. Non se podía permitir antes e non é defendíbel que nun momento en que se poderían estar creando postos de traballo se mantecía un veto político.

No caso do Barbanza, Muros-Noia e Santiago, nesta lexislatura sentáronse as bases para o desenvolvemento do chan industrial e debemos continuar nese traballo.

“Sogama é un edificio cun fallo estrutural no que se intentaron facer reformas parciais”

Entrevista a Xosé Regueira, Candidato do BNG por Bergantiños



Xosé Regueira, nado na Laracha hai 41 anos, é o representante bergantiñán na candidatura do BNG ao Parlamento Galego. Reside en Carballo e desempeña o cargo de Responsable Comarcal do BNG desde o ano 2000.

Como afrontas o repto de ser o candidato do BNG pola Comarca?

Como fago todo en política, con moita ilusión e responsabilidade, pois agora correspóndeme ser a persoa que lle translade á sociedade o que o BNG lle ten que decir, cando ántes me correspondía un papel menos público pero igualmente activo.

De todolos xeitos o BNG é unha forza política que pon por diante as ideas e os proxectos, e entendo que Bergantiños está, e estará, ben representado polo BNG independentemente de onde residan as súas deputadas/os.

Entraches a militar no BNG na Laracha no ano 95, e tiveches un importante papel na organización a nivel local. Como recordas aquela época?

Foron tempos duros, ser do BNG na Laracha significaba unha ruptura moi grande co modelo social e político que nos impoñía o Partido Popular. Quédame a satisfacción de ter axudado a que o BNG da Laracha leve no seu ADN a idea de que, en política, o importante é ter unha visión colectiva dos problemas e das solucións, máis alá dos personalismos ou localismos estériles; por iso na Laracha medramos cada día tanto en militancia como en influencia social.

Cal é a mensaxe máis relevante que vas lanzar durante a campaña?

Creo que o máis importante que teñen estas eleccións é que nesta ocasión o BNG se presenta para ser “xulgado” polos seus feitos no Goberno galego, e non polo que outros din de nós. Calquera pode comprobar que o BNG foi o motor do cambio, e que este cambio debe incrementarse na vindeira lexislatura.

En qué beneficiou máis a acción de Goberno do BNG na Xunta á Laracha e a Bergantiños?

A un nivel máis evidente calquera pode ver que a dotación de Parques Industriais público, como é o caso da Laracha, ou a posta en marcha do Sistema Galego de Benestar (que é a iniciativa política máis revolucionaria feita en Galiza) coa posta en marcha das Galescolas ou do futuro Centro de Día da Laracha, foron moi relevantes para a Comarca.

Tamén hai que ter en conta políticas que van máis alá do local, coma o Banco de Terras; o poñer ao sector eólico ao sevizo do País; ou os programas “Quérote”.

Pero quero salientar o feito de que a xente viu nas áreas de goberno do BNG a unha administración amiga e non un obstáculo, como sucedía na era Fraga, e iso, anque se note pouco é un cambio moi importante.

E cales son as propostas fundamentais do BNG para a próxima lexislatura?

Entendemos que o paso do BNG polo goberno fixo moito polo País, pero tamén é moito o que queda por facer; na educación, na sanidade, ou na política lingüística é necesaria unha óptica nacionalista. O BNG pretende seguir creando políticas en beneficio das maiorías sociais do País. Hoxe, coa crise económica, é máis preciso que nunca crear un Banco Público Galego, cambiar a Lei de Caixas para poñelas ao servizo do País; e facer o mesmo coas Infraestruturas (a AP 9 por exemplo), para que deixen de ser medios de enriquecemento dos especuladores.



Xosé Regueira nun Mitin na Laracha

Como contactar co BNG da Laracha:

Xoán M. Sande: 646 916 638

Carolina Castiñeiras: 663 732 919

Mónica Castro: 651 170 764

Máis información: www.bng-galiza.org/alaracha

